

Vanzgyangh Yananz Gaiqnduj Cietfaenlungz Mauznanzcuz:

# Baijyienj Vwnzva Ndawbiengz Ciuhnduj

展示原生态民间文化的环江下南首届毛南族分龙节

□ Aob Maiceb iogj Sibhyungz boiz



▲ Ndaw mbanj hek daengz lai, caemh daiz lwnh saedcej.



▲ Aen yizsi "nabvaiz", vunzlai bibi guh.



▲ Aen yizsi mbaenjmuengh, hawj beixnuengx soengq fuk.



▲ Naengh boux mbiengj doiq fwen, sing haprwenz doh mbanj.



▲ Roq gyong yiengjding-dung, yinx bai lungz daeuj yawj.



▲ Guhdaih bae giuzcangz, angqyangz gvaq ngoenzciet.



▲ Caeqbaiz "faexdoengzsim", lumi fim doxriet maenh.



▲ Doxgaiq caeq baij ndei, caj goengsae daeuj cuengq.



▲ Mbanjmbanj cungj nda daiz, caez caeqbaiz mbaenj fuk.

Bi 2014, Vanzgyangh Gah-swhdwz bauqaeu seiqgyaiq swyenz yizcanj ndaej baenz, couh roeb cietfaenlungz daeuj daengz, ndigah ngoenzciet hoengghwd nauhyied raixcaix, 6 nyied 20-22 hauh youq yienhsingz banh le lai cungj lai yiengh angq hoh hozdung. Riengzlaeng 25-26 hauh youh youq ndaw yienh Yananz Yangh banh cietfaenlungz Mauznanzcuz. Gij vunz youq rog guhhong haenx cungj dauqma gvaq ciet, gij lauxhangz, bouxmizyinx caeug hekyouz caemh bae dem nauhyied, gij beixnuengx gaenhlaenz seiqhenz cix comz bae daengz ndaw mbanj Mauznanz, geij cien baenz fanh vunz angqyangz gvaq ciet, nauhyied hoengghwd.

Cietfaenlungz dwg ngoenz ciet conzdungj Mauznanzcuz mbaenj saenz baujyouh fungsou ndeu, dwg beixnuengx Mauznanzcuz hangh hozdung hungloet moix bi banh baez ndeu, youh heuhguh "cietraemxfwn". Vunz Mauznanzcuz nyinhnaeuz moix bi liggaeug hahceiq ngoenz ngoenzsaenz (ngoenzlungz) daih' it dwg ngoenz raemx lungz doxfaen, raemx lungz doxfaen couh mbouj ndaej fwn yinz rumz dingh, ndigah ngoenz neix yaek aeu caeq saenz bauj gomiuz, mbaenj gohaeux gogo fungsou, hozdung lienndaemh banh song sam ngoenz.

Yananz dwg giz fathwnj Mauznanzcuz, gizneix vunz simsoh lauxsaed, doxgiet doxhuz. Ngoenz 25 hauh, Yananz Gaiqnduj Cietfaenlungz aen yizsi "nabvaiz" youq Mbanjsunghlangj gawjbanh, "nabvaiz" caemh heuhguh "dubvaiz", duzvaiz deng dub haenx heuhguh "vaizmiuh", vunz Mauznanzcuz nyinhnaeuz, mwh "nabvaiz", gij vunz youq henz haenx cungj ndaej daengz Goengsamgyaiq baujyouh, fukheiq

hwnj ndang, daengx bi seiqgeiq swnh faen swnh raemx, vuenyungz gitleih. Yizsi guh sat le, doiq fwen doxdax daengj vwnzdij hozdung couh riengzdwk guh ndaej nauhyied dangqmaz, vunzlai mbanj dingq fwen mbanj yawj yienh heiq, angqvauvau najrongh raixcaix.

26 hauh banhaet, vunzlai youh comz youq gwnz giuzcangz Mbanjsunghlangj, guh aen yizsi mbaenjmuengh, caenh raen gwnz daizyieng cuengq miz aen gyauejvaiz ndeu, geij boux goengsae ngon ging caeq Goengsamgyaiq; gwnz giuzcangz baij miz haujlai aendaiz, moix aen mbanj aen daiz ndeu baij rim mouseiq, bitgaeq, haeuxnaengj haj saek daengj doxgaiq dwkcueugq, vunzlai youq ndaw sing ngon ging goengsae caez guhsax caeqbaiz, mbaenjmuengh ndaw ranz demsou vunzcaen ndang ndei vuenyungz. Banringz, vunzlai doxcaeh bae daengz laj Byacomzcaiz Mbanjgenbingz, guh aen yizsi caeqbaiz "faexdoengzsim". Go faex neix dwg go faexreizraemx ndeu gotgop go faexdanzhenj ndeu caez maj, caemh ganjfaex mbouj caemh mbaw, saenzgeiz youh bi' ndwen geq, gyoengq vunzmbanj yawj guh faexsaenz, moix bi cungj bae laj faex siu yieng dwkcueugq. Gyoengqvunz heux couznding, raek va'nding hwnj gwnz gofaex, lij sij gij vah hohfuk hwnj gwnz baengz bae hoij hwnj nyefaex, dakgeiq maqmuengh. Youq laj "faexdoengzsim", gyoengq bouxcoz ndaw mbanj lij cingj seiq boux vunzlaux naengh dwk caemhcaiq soengq hawj hoengzbau, yienh' ok gij fungsug gingq laux daih cienz daih Mauznanzcuz.

Dangqnaj, cietfaenlungz Mauznanzcuz gaenq lied haeuj Guengjsae raeuz minzcuz cietgingq cib daih binjbaiz ndawde aen ndeu.